

**Broj: 06-03-269-12/8/16**  
**Mostar, 24.05.2016. godine**

Na osnovu člana 21., člana 37., člana 42., člana 84. i člana 87. stav (1) i stav (2) Zakona o električnoj energiji u Federaciji Bosne i Hercegovine („Službene novine Federacije BiH“ broj 66/13 i 94/15), člana 20. stav (2) Zakona o korištenju obnovljivih izvora energije i efikasne kogeneracije („Službene novine Federacije BiH“ 70/13 i 5/14), člana 20. stav (1) i člana 23. stav (1) Statuta Regulatorne komisije za energiju u Federaciji Bosne i Hercegovine („Službene novine Federacije BiH“ broj 24/14 i 91/15), člana 8. stav (1), člana 32. stav (4) i člana 42. stav (1) Poslovnika o radu Regulatorne komisije za energiju u Federaciji Bosne i Hercegovine („Službene novine Federacije BiH“ broj 29/14 i 31/16), člana 78. Pravilnika o javnim raspravama i rješavanju zahtjeva, sporova i žalbi („Službene novine Federacije BiH“ broj 57/12, 71/14 i 31/16), člana 20. Pravilnika za izdavanje dozvola („Službene novine Federacije BiH“ broj 43/14), člana 10. stav (3) i člana 13. stav (2) Pravilnika o sticanju statusa kvalifikovanog proizvođača električne energije („Službene novine Federacije BiH“ broj 53/14), postupajući po Zahtjevu za izdavanje dozvole za rad za proizvodnju električne energije broj 06-03-269/8/16 od 25.02.2016. godine, podnosioca zahtjeva „AMITEA-II“ d.o.o. Mostar, Ul. Bišće polje bb (preko puta PC OBI), Mostar, Regulatorna komisija za energiju u Federaciji Bosne i Hercegovine – FERK je dana 24.05.2016. godine na IX redovnoj sjednici donijela sljedeće

## RJEŠENJE

1. Izdaje se Dozvola za rad za proizvodnju električne energije podnosiocu zahtjeva „AMITEA-II“ d.o.o. Mostar.
2. Utvrđuje se „AMITEA-II“ d.o.o. Mostar, status kvalifikovanog proizvođača u proizvodnim objektima mHE „Kraljušćica 1“ i mHE „Kraljušćica 2“, u periodu važenja dozvole iz tačke 3. ovog rješenja.
3. Dozvola za rad izdaje se na period od 24.05.2016. godine do 23.05.2021. godine, sa uslovima dozvole koji čine njen sastavni dio.
4. Sastavni dio ovog rješenja čini dozvola iz tački 1. i 3. ovog rješenja.
5. Imalac dozvole je obavezan plaćati regulatornu naknadu na način i u iznosu koji utvrdi FERK posebnom odlukom.
6. Ovo rješenje je konačno, te se objavljuje na oglasnoj tabli i internet stranici FERK-a, a dispozitiv ovog rješenja u „Službenim novinama Federacije BiH“.

## Obrazloženje

FERK je 25.02.2016. godine primio od podnosioca „AMITEA-II“ d.o.o. Mostar Zahtjev za izdavanje dozvole za rad za proizvodnju električne energije broj 06-03-269/8/16, te 10.03.2016. godine dopunu Zahtjeva za izdavanje dozvole za rad za proizvodnju električne energije pod brojem 06-03-269-01/8/16.

Prilikom pregleda potpunosti podnesenog zahtjeva, u skladu sa članom 9. Pravilnika o javnim raspravama i rješavanju zahtjeva, sporova i žalbi, FERK je utvrdio da podneseni zahtjev nije potpun u smislu člana 12. Pravilnika za izdavanje dozvola. Zbog navedenog, FERK je postupajući u skladu sa članom 10. Pravilnika o javnim raspravama i rješavanju

zahtjeva, sporova i žalbi dostavio podnosiocu zahtjeva Obavještenje o nedostacima podnesenog Zahtjeva za izdavanje dozvole za rad za proizvodnju električne energije broj 06-03-269-02/8/16 od 25.03.2016. godine, te mu odredio rok radi otklanjanja u obavještenja naznačenih nedostataka i upozorio ga na posljedicu propuštanja.

Postupajući po obavještenja, podnosilac zahtjeva je dostavio dopis primljen u FERK 30.03.2016. godine pod brojem 06-03-269-03/8/16, te dopis primljen u FERK 30.03.2016. godine pod brojem 06-03-269-04/8/16, uz koje je dostavio tražene informacije i obrazloženja.

Postupajući u skladu sa članom 15. Pravilnika za izdavanje dozvola FERK je dana 01.04.2016. godine u „Večernjem listu“, „Dnevnom avazu“ i „Nezavisnim novinama“, kao i na svojoj i internet stranici, objavio Obavještenje za javnost o podnesenom Zahtjevu za izdavanje dozvole za rad za proizvodnju električne energije podnosioca zahtjeva „AMITEA-II“ d.o.o. Mostar. Povodom Obavještenja za javnost, FERK do roka naznačenog u obavještenju odnosno do 08.04.2016. godine do 10:00 sati, nije primio pisane komentare zainteresovanih lica na podneseni zahtjev, niti su podneseni zahtjevi za sticanje statusa umješaća.

Na osnovu navedenog, a u skladu sa članom 55. Pravilnika o javnim raspravama i rješavanju zahtjeva, sporova i žalbi, FERK je dopisom broj 06-03-269-06/8/16 od 08.04.2016. godine, obavijestio podnosioca zahtjeva o svojoj namjeri provođenja postupka izdavanja dozvole bez održavanja formalne rasprave, te istom dao mogućnost da ukoliko raspolaže novim činjenicama u vezi sa predmetom postupka, iste predstavi, odnosno uputi svoje komentare FERK-u do 13.04.2016. godine.

Postupajući po navedenom obavještenju, da se postupak izdavanja dozvole provede po skraćenom postupku, podnosilac zahtjeva je dostavio FERK-u dopis primljen 13.04.2016. godine pod brojem broj 06-03-269-07/8/16, u kojem je naveo da je saglasan da se postupak izdavanja dozvole provede po skraćenom postupku i nije iznio nove činjenice u vezi sa predmetom postupka, te nije uputio druge komentare FERK-u.

Na osnovu provedenog postupka tokom kojeg je izvršena pažljiva analiza svih činjenica i podnesenih dokaza na osnovu kojih se moglo utvrditi stanje stvari, FERK je u skladu sa članom 17. stav (2) i stav (3) Pravilnika za izdavanje dozvola, pripremio Nacrt dozvole za rad za proizvodnju električne energije po zahtjevu broj 06-03-269/8/16 od 25.02.2016. godine, podnosioca „AMITEA-II“ d.o.o. Mostar. Na osnovu člana 92. stav (2) Zakona o električnoj energiji u Federaciji Bosne i Hercegovine, FERK je Odlukom broj 06-03-269-08/8/16 od 15.04.2016. godine usvojio Nacrt dozvole za rad za proizvodnju električne energije, dok je Odlukom FERK-a broj 06-03-269-09/8/16 od 15.04.2016. godine ovaj nacrt upućen u proces javne rasprave, te je određeno mjesto, datum i vrijeme održavanja opšte rasprave o predmetnom Nacrtu dozvole za rad za proizvodnju električne energije, imenovan voditelj postupka i zamjenik voditelja postupka, kao i da zainteresovana lica svoje usmene komentare na Nacrt dozvole za rad za proizvodnju električne energije mogu dati na opštoj raspravi koja je održana 28.04.2016. godine u 11:00 sati, u prostorijama Opštine Konjic, u Konjicu, a pisani komentari su se mogli dostaviti na adresu FERK-a ili na elektronsku adresu, u periodu od 19.04.2016. godine do 29.04.2016. godine do 14:00 sati.

Opštoj raspravi o Nacrtu dozvole za rad za proizvodnju električne energije prisustvovali su predstavnici FERK-a i podnosioca zahtjeva. Podnosilac zahtjeva je istakao da nema primjedbi na predloženi tekst Nacrta dozvole, kao i da će „AMITEA-II“ d.o.o. Mostar ispuniti sve dozvolom postavljene uslove.

Do ostavljenog roka za dostavu pisanih komentara, odnosno do 29.04.2016. godine do 14:00 sati, u FERK nisu primljeni pisani komentari na Nacrt dozvole za rad za proizvodnju električne energije.

U skladu sa članom 19. Pravilnika za izdavanje dozvola, voditelj postupka pripremio je pisani izvještaj, te je isti uputio podnosiocu zahtjeva na komentare 05.05.2016. godine pod brojem 06-03-269-10/8/16.

Podnosilac zahtjeva je povodom navedenog FERK-u dostavio 10.05.2016. godine dopis primljen u FERK pod brojem 06-03-269-11/8/16, u kojem je naveo da je saglasan sa izvještajem voditelja postupka javne rasprave.

Izvještaj voditelja postupka dostavljen je članovima FERK-a dana 05.05.2016. godine pod internim brojem 06-08-470/16, na razmatranje radi donošenja odluke.

Na osnovu obrade Zahtjeva za izdavanje dozvole za rad za proizvodnju električne energije podnosioca „AMITEA-II“ d.o.o. Mostar i dokumentacije priložene uz zahtjev, utvrđeno je da podnosilac zahtjeva ispunjava kriterije za izdavanje dozvole za rad za proizvodnju električne energije i za sticanje statusa kvalifikovanog proizvođača u skladu sa Zakonom o električnoj energiji u Federaciji Bosne i Hercegovine i Zakonom o korištenju obnovljivih izvora energije i efikasne kogeneracije, te Pravilnikom za izdavanje dozvola i Pravilnikom o sticanju statusa kvalifikovanog proizvođača električne energije.

Na osnovu navedenog, kao i analize postupka opšte rasprave, odnosno izvještaja voditelja postupka, u dozvoli koja je predmet ovog rješenja podnosiocu zahtjeva postavljeni su, u skladu sa članom 32., članom 33. Pravilnika za izdavanje dozvola i članom 13. stav (1) Pravilnika o sticanju statusa kvalifikovanog proizvođača električne energije, određeni uslovi. Spomenuti uslovi uvažavaju potrebu, ali i obavezu „AMITEA-II“ d.o.o. Mostar, da u rokovima propisanim u uslovima dozvole za rad za obavljanje licencirane djelatnosti proizvodnje električne energije iste ispuni, u cilju zadovoljenja propisanih kriterija.

Na osnovu navedenog, odlučeno je kao u dispozitivu ovog rješenja.

#### **POUKA O PRAVNOM LIJEKU:**

Protiv ovog rješenja podnosilac zahtjeva može tužbom pokrenuti upravni spor kod Kantonalnog/Županijskog suda u Mostaru u roku od 30 dana od dana prijema rješenja. Tužba se predaje sudu direktno ili mu se šalje poštom preporučeno. Tužba se može izjaviti i na zapisnik kod navedenog suda ili bilo kojeg drugog suda.

**v.d. PREDsjedNICE FERK-a**  
**Sanela Pokrajčić**